

宋史新編

宋史新編卷一百八十九

列傳一百三十一

明南京戶部主事莆田柯維騏著

叛臣下

李全

劉整

呂文煥

呂文福呂師夔有為
陳英陳廣附

夏貴

范文虎

留夢炎

李全濰州北海農家子也銳頭露目權譎善下人以弓馬趨捷能運鐵槍號李鐵槍初金主避元兵竄于汴民苦橫斂思亂於是劉二祖起霍儀繼之彭義斌石珪夏全時青裴淵等附之楊安兒起以舅劉全為帥閭通董友張正中孫武正等附之全與仲兄福聚眾數千劉慶

福國安用鄭衍德田四千洋等咸附之元兵退金乃遣
兵討捕安兒敗妹四娘子狡悍善騎射劉全等奉而統
之稱曰姑姑衆尚萬餘全以其衆附楊氏通焉遂嫁之
霍儀敗其徒彭義斌等歸李全有定遠民季先者安兒
嘗處以軍職及是寅緣鎮江武鋒卒沈鐸見楚州守應
純之道豪傑願附意時江淮制置李珣淮東安撫崔與
之皆令純之沿江增戍恐不能禦乃命先爲機察諭意
羣豪敘復鐸爲武鋒軍副將辟楚州郡監與高忠皎各
集忠義民兵分二道攻金先遂以李全五十人附忠皎
合兵攻剋海州全分兵襲破莒州禽其守臣別將千洋

又克密州兄福又克青州全因得授武翼大夫京東副
總管純之密聞于朝謂中原可復丞相史彌遠鑒開禧
事不明招納密敕珏等慰接之號忠義軍就聽節制詔
依武定軍生券例放錢糧萬五千人名忠義糧東海馬
良高林宋德珍等萬人遂輻湊漣水鐸納之全與劉全
俱起羨心焉嘉定十一年全圍海城不下分兵襲密州
禽黃擗十二年金人圍淮西急帥司調全與季先石珪
軍援盱眙先進駐天長全進駐盱眙鼎立以待敵全至
渦口值金將乞石烈牙吾答名盧鼓槌者將濟全掩擊
之金兵溺淮者數千俘獲甚衆數日又與阿海戰化陂

湖大捷殺金數將得其金牌三圓俱解全喪失亦衆阿
海者金所謂四駙馬也全進達州刺史全說降金元帥
張林以青莒等十二州來歸全與林結爲兄弟表聞授
林武翼大夫京東安撫兼總管餘授官有差授全廣州
觀察使京東總管慶福義斌皆爲統制先是制置使賈
涉以朝命督戰立賞約全乃致金牌干涉云殺四駙馬
所獲者故全有是授而四駙馬實不死也十三年全至
楚州屬召先赴行在全自渦口之捷有輕諸將心獨先
嘗策戰助威望不下已患之乃陰結制帥所任吏莫凱
使譖先先卒全喜而心益貳涉乘先死欲收其軍輟統

制陳選往漣水以總之先黨裴淵宋德珍孫武正及王
義深張山張友拒而不受潛奉石珪爲統帥全伺知之
乃見涉請討珪珪素通好於元至是技窮殺淵而挾武
正德珍與其謀主孟導歸元漣水軍未有所屬全求併
將之全又白制府請于朝以劉全爲總管駐揚州分數
千兵從之而將其衆十四年正月金人將南來全請於
涉欲與劉瑋共圖泗州伐其謀涉許之全兵攻尅泗州
之西城入城布守瑋徙盱眙粟以實之未幾廬鼓槌
來取西城全戰敗統制賴興死全遁歸資糧器械悉以
委敵金人旣陷蘄州扈再興趙范及其弟葵邀擊于天

長全隨行襲金人後謁而賀曰二監軍已立大功乞以
餘寇付全追之全追不甚力亦以是進承宣使十五年
二月琯再取西城盧鼓槌背城力戰戒張惠必獲全不
獲則斬惠卽陳躍馬奔全壁棄所執兵請降全掖而起
之惠號賽張飛者也不數日惠戲下數千人皆潛至全
與惠歸請于制置司官之令自總一軍膠西當登寧海
之衝百貨輻湊全使其兄福守之爲窟宅計輦貨車夫
皆督辦於林林不能堪福怒謂曰若背恩耶待與都統
提兵取若頭爾林懼歸于元福狼狽走楚州冬加全昭
信軍節度林猶遺涉書詆全明已非叛涉以咎全全請

爲朝廷取之乃提師駐海州以迫林林走全遂入青州
十六年二月涉勸農出郊春歸入門忠義軍遮道涉使
人語楊氏楊氏馳出門佯怒忠義而揮之道開涉乃入
城自是以疾求去甚力五月被召卒丘壽邁攝帥事全
請曰忠義烏合尺籍鹵莽莫若別置新籍一納諸朝一
申制閫一留全所庶功過有攷請給無弊壽邁善而諾
之全乃合帳前忠義悉籍之盡統其軍時人莫悟十一
月許國自武階換朝議大夫淮東安撫制置使先是國
奉祠家食數言全必反欲傾涉而代之會召國奏事國
疏全姦謀甚深反狀已著非有豪傑不能消弭蓋自鬻

也吏部侍郎喬行簡上疏論國望輕不宜帥淮不報山
陽參幕徐晞稷雅意開闢及聞國用晞稷闕望乃謄國
奏注釋以寄全全得報不樂十七年正月國之鎮楊氏
郊迂國辭不見楊氏慚以歸國既視事痛抑北軍有與
南軍競者無曲直偏坐之搞賚十裁七八八月全謁國
庭趨國端坐納全拜不爲止全退怒甚國之客章夢先
主幕議劉慶福謁見夢先責客將令隔簾貌喏慶福亦
不能堪全欲往青州懼國苛留更折節爲禮因會席開
出劄白事國見其細故判從之全卽席再拜謝自是動
息必請得請必拜國大喜語家人曰吾折伏此虜矣全

遂往青州實慶元年全遣慶福還楚城使爲亂潛約盱
眙四軍相應四將不從於是慶福等謀中輟止欲快意
於許國焉國晨起蒞事忽露刃充庭客駭走國厲聲曰
不得無禮矢已及穎流血蔽面國走亂兵悉害其家人
縱火焚官寺兩司積蓄盡入賊國縋城走伏道堂中宿
焉是日慶福首殺夢先以報宿憾明日國縊于途時忠
義統領王文信提本部兵歸揚州謀縛守以其城獻事
泄爲鈴轄趙拱所阻文信遂與劉全還楚州盱眙總管
夏全聞山陽得志亦懷異圖劉瑋厚賂之乃止及文信
亂瑋懼夏全復動乃使卞整將兵三千視之使不敢動

整以邀文信爲辭引兵還揚州因僞言盱眙失守卞整爲亂於是揚州復震城門晝閉史彌遠當國懼激他變姑涵忍而後圖之謀帥莫可以徐晞稷嘗倅楚州守海州得全歡心晞稷亦勇往乃授淮東制置使令屈意撫全時慶福以事濟報全全牒義斌等曰許國謀反已伏誅矣爾軍並聽我節制義斌罵曰逆賊背國厚恩擅殺制使此事皆因我起我必報此讎乃斬齋牒人南向告大誓衆見者憤激全自青州至楚城佯書慶福不能彈壓致忠義之閔斬數人請待罪朝廷未之詰趙范時知揚州兼提點刑獄得制置印于潰卒中以授晞稷全遣

騎逆晞稷已卯晞稷入楚城劉全驍馬登郡廳晞稷迎之全及門下馬拜庭下晞稷降等止之賊衆乃悅四月時青使人僞爲金兵道邳州出漣水奪全田租而伏騎八百以待全引騎度淮與閻伏發全敗圍之慶福以兵往拔全出全與慶福俱重傷歸楚州丁勝張世雄欲乘全敗舉兵追北軍晞稷止之全後知其謀對晞稷詰之二人不爲屈然懼禍及已晞稷乃潛授世雄勝軍統制教使逃而陽索之北軍追世雄世雄凡戰且走得達揚州晞稷屢令全還戰馬軍器于制司全唯唯退招姚翀及將校飲酒酣全語之故一人曰不若有官者棄官無

官者歸山東爲百姓一人抵掌憤然使全反全陽罵之
狎以告晞稷翌日全見晞稷求納官晞稷撫之而去自
是不復誰何其後至以恩府稱全恩堂稱楊氏而手足
倒置矣五月全取東平不克引兵攻恩州明日義斌出
兵與全鬪全敗慶福往救又敗全退保山崗抽山陽忠
義以北遣人求晞稷書與義斌連和義斌納全降兵兵
勢大振進攻真定降全將武仙衆至數十萬致書沿江
制置使趙善湘曰不誅逆全恢復不成時四總管亦各
遣計議官致書乞助討賊范亦以爲言不報全貽書制
置司誣義斌叛晞稷繳達之時朝廷知義斌之功憚全

未欲行賞未幾義斌俟命不至拓地而北與元兵戰于
內黃之五馬山元兵說之降義斌厲聲曰我宋臣且河
北山東皆宋民義豈爲他臣屬耶遂死之戲下王義深
等復歸全全使人說時青亦附全二年三月元兵攻青
州全大小百戰終不利嬰城自守朝廷初以力未能討
故用晞稷調護及傳全被圍稍欲圖賊晞稷畏懦幸全
未歸以苟歲月朝廷方謀易帥劉瑋父在盱眙雅意建
閫又見賊勢稍孤意功名可立使鎮江副都統彭忞延
譽京師忞亦垂涎瑋從吏尤力九月以瑋知楚州兼
淮東制置使忞代知盱眙晞稷不知也乙亥晞稷以戶

部侍郎召已出知袁州十一月琚至楚州怵激夏全曰
楚城賊黨不滿三千健將又在山東劉制使圖之收功
在旦夕太尉宜往赴事會何端坐爲夏全欣然領兵徑
入楚城時青亦自淮陰移屯城內琚且駭且恐勢不容
卻復就二人謀焉時傳全已死福欲分兵赴援兵少卒
不往甲子琚令夏全盛陳兵楚城賊黨震恐楊氏賂夏
全求緩師乃止三年二月楊氏使人行成于夏全曰將
軍非山東歸附耶孤死免泣李氏滅夏氏寧獨存全許
諾楊氏盛飾出迎與按行營壘曰人傳三哥死吾一婦
人安能自立便當事太尉爲夫子女玉帛干戈倉廩皆

太尉有望卽領此誠無多言也夏全心動乃置酒歡甚
飲酣就寢如婦更與福謀遂瑋辛卯全令賊黨圍州治
焚官民舍殺守藏吏取貨物時瑋精兵尚萬餘窘束不
能發一令夜半縋城僅以身免全旣逐瑋幕歸楊氏拒
之意楊氏反目圖已明日大掠趨盱眙欲爲亂張惠范
成進閉門不得入翔翔淮上惠成進出兵欲勸之夏全
狼狽歸金金人納之是舉也張正忠不從亂經妻女子
庭弁已自焚報至中外大恐劉琬自劾未幾死初姚狝
從賈涉辟楚州推官全喜其附已爲引重當路得改秩
全請以通判青州國之死全借狝撫定以誑衆以功入

朝三月以狝爲軍器少監知楚州兼制置狝辟鄭子恭杜耒等爲幕客留母及其子于京買二妾以行至城東艤舟以治事楊許狝入城乃入寄治僧寺極意娛之四月李全欲歸元懼衆異議乃焚香南向再拜欲自經而使鄭衍德田四救之曰譬如爲衣有身愁無袖耶今北歸蒙古未必非福全從之乃約降元元兵入青州承制授全山東行省慶福在山陽自知已爲厲階懷不自安欲圖福以自贖福知之亦謀去慶福福僞病旬餘張甫者素厚慶福懼福疑已乃勸慶福往問疾福殺慶福及甫甫本金元帥封高陽公歸全者也福以慶福頭納狝

翀大喜未曰慶福首禍一世英雄今頭落措大手耶飛
報于朝遣子恭繼奏捷琫之敗儲積掃地綱運不續賊
黨籍籍謂福所致福數見翀及僉幕促之皆謝以朝廷
優降未下福曰朝廷建閫開幕不支忠義錢糧是欲立
制閫以困忠義也六月福乘衆怒與楊氏謀召翀飲翀
至而楊氏不出就坐賓次左右散去福以翀命召諸幕
客以楊氏命召翀二妾諸幕客知有變不得已往未朝
服至八字橋福兵欲害翀鄭衍德救之得免去須鬢縫城
翀及見之福兵欲害翀鄭衍德救之得免去須鬢縫城
夜走徒步歸明州未幾死朝廷以淮亂相仍遣帥必斃

莫肯往來始欲輕淮而重江楚州不復建閩就以帥楊紹雲兼制置改楚州名淮安軍命通判張國明權守視之若羈縻州然賊徒黨塞南門開北門支邑民田皆以少價抑買之自收賦以贍軍錢糧不繼如故賊將國安用閭通歎曰楚州物賤可以樂生而劉慶福爲不善怨仇相尋使我曹無所衣食與張林邢德王義深五人共議殺福及楊氏以獻於是衆帥兵趨楊氏家福出德手刃之相屠者數百人有郭統制者殺全次子通殺一婦人以爲楊氏函其首并福首馳獻紹雲紹雲驛送京師傾朝甚喜檄彭卞張惠范成進時青旂兵往楚州便宜

盡戮餘黨未幾傳楊氏故無恙所殺者乃全次妻劉氏也。托輕儇每供四總管弄戲得歡不敢自決力遜惠成。進二人卽提兵入楚城與林等五人歡宴議分北軍爲五使五人分掌之。請制府及朝廷處之。廟議謂青望重惟聽青區畫。省檄之下不及惠成。進青亦恐禍及密遣人報全于青州。遷延不決。惠等歸盱眙。賊黨復振。紹雲赴樞密稟議。淮東總領岳珂攝制府事。惠成進旣歸錢糧缺乏。密約降金。盧鼓槌許之。二人給托曰：「南北軍易致激變。宜令出入無得帶刃。」托從之。二人每宴托必徧迨。皂隸托皆不悟。八月辛酉復燕。托酒半縛托。托從者

無寸鐵且醉皆就縛卽日渡淮輸款以盱眙附盧鼓棹于泗州金兵至開門接之諸軍不戰皆降盧鼓棹與惠釋憾連姻金官惠有加俾專制河南以拒元自是金人窺淮東益急朝廷調京湖制置司兵萬人屯青平山以備全全得青報慟哭力告元將求南歸不許斷一指示不畔許之承制授山東淮南行省得專制山東而歲獻金幣十月丙辰全與元張宣差并通事數人至楚州服元衣冠文移紀甲子而無號義深走金安用殺林德自贖丁巳全邀青及張國明于淮陰國明辭疾青父子同至全推殺其子者郭統制斬之全亦惡青反覆青與妻

俱被害遂併青軍紹定元年春全厚募人爲兵不限南北宋軍多亡應之又募南匠大治舳舻船自淮及海相望其秋全及楊氏大閱戰艦于海洋十一月全至楚州全山東經理未定而貢于元歲不缺故外恭順于宋以就錢糧往往貿貨輸元宋得少寬北顧之憂遣餉不輟二年四月全以糧少爲詞遣海舟自蘇州洋入平江嘉興告糴實欲習海道規畿甸也三年二月御前軍器庫火得縱火者楚州軍穆椿全實遣之於是先朝兵甲盡喪矣全擬先據揚州渡江衍德等曰通泰鹽場在焉莫若先取爲家計全欲朝廷不絕錢糧乃挾元李宋二宣

差恫疑虛喝使國明達諸朝而元實未嘗資全兵有識
李宣差者曰此青州賣藥人也七月召國明稟議全以
寶王資其行賓從所過揚言李相公英略絕倫其射五
百步朝廷莫若裂地王之與增錢糧使富邊境徧餽要
津求主其說既見廟堂以百口保全不叛八月全羅麥
舟過鹽城縣權制置翟朝宗嗾尉兵奪之全怒水陸數
萬徑擣鹽城據之知縣陳遇踰城走公私鹽貨皆沒於
全朝宗乃遣下整領兵扼境全留鄭祥董友守鹽城提
兵往楚全言于朝稱遣兵捕盜過鹽城令自棄城遁處
軍民驚擾未免入城安衆乃加全兩鎮節令釋其遣

諭之全曰朝廷待我如小兒啼則與果不受朝廷爲罷
朝宗通判揚州趙璪夫暫攝事節制鎮江滁州軍馬趙
范趙葵慮全必反累疏力言之史彌遠不納全造舟益
急至發冢取黏板鍊鐵錢爲釘熬人脂擣油灰列炬繼
晷招沿海亡命爲水手又給璪夫以元爲詞邀增五千
人錢糧求誓書鐵券朝廷猶遣餉不絕全得米卽自轉
輸淮海入鹽城以贍其衆他軍士見者曰朝廷惟恐賊
不飽我曹何力殺賊射陽湖人至有養北賊戕淮民之
語聞者太息全又遣人以金牌誘脅周安民等造浮梁
于諭口以便鹽城來往又開馬擺港壽河引淮船入湖

爲攻撓水砦計十月朝命趙善湘爲制置使以圖全全
言於善湘曰趙制置岳總管二趙兄弟人自爲政使全
難處全欲決定去就親往鹽城存劄若有疾全疑全者
如趙知府輩便可提兵決戰設能滅全高官重祿任彼
取之如或不能方表全心善湘甚憤范亦請調兵執政
鄭清之袁韶等議合力贊計全事遂決十二月金字牌
進善湘煥章閣學士江淮制置大使范直徽猷閣知揚
州淮東安撫副使弟葵直寶章閣淮東提點刑獄兼知
滁州俱節制軍馬全子才軍器監簿制置司參議官下
詔聲李全罪削其爵停給錢糧勅善湘等討之仍促荆

襄淮西諸軍赴援全兵突至灣頭揚州副都統下勝拒之時朝廷猶有內圖戰守外用調停之說璪夫得彌遠書許增萬五千人糧勸全歸楚州璪夫以授全全擲書不受曰丞相勸我歸丁都統與我戰非相給耶遂引兵抵泰州知州宋濟迎降全入盡收子女貨幣及是全聞范葵已入揚州城咎衍德鞭之曰二趙入揚州矣江其可度耶今惟有徑擣揚州耳乃配兵守泰州悉出衆宜陵至灣頭立砦據連河之衝使胡義將先鋒馬駐平山堂伺三城機便全攻城東門不利全隔濠見葵而去語在葵傳全連日接戰俱不利會襄兵萬人至真州上埧

統制張達監軍張大連不設備魚貫而行全哨馬帥田
四擊之爲數截殲者五千達大連死之城中不知也襄
兵敗全兇焰益振復引輕騎犯州城南門統制陳達率
勁弩射之范葵出軍迎擊乃去是日全玠等距淮安十
里焚全砦柵全將劉全出戰玠軍不利退屯寶應全志
吞三城而兵每不得傳城下全乃用宗雄武計築長圍
以困三城全張蓋奏樂平山堂布置築圍指揮閒暇范
葵令諸門以輕兵牽制親帥將士出堡砦西全分路鏖
戰自辰至未殺傷相當越二日范出師大戰玠等破全
將張友于都倉數日葵出戰又捷四年正月范葵累與

全戰俱捷始全反謀雖成然多顧忌好進喜事者欲挾
賊爲重或陰贊之謂激作愈甚朝廷愈畏則錢糧愈增
又許身任調停之責故全兵將舉而張國明先召全之
託詞陳遇棄城及歸過三趙圖已蓋成謀也及三趙用
宋師集諸閩易國明沮削全官爵罷支錢糧攻城不得
欲戰不利全始自悔忽忽不樂常歎曰國明誤我望日
全置酒高會平山堂有卒識其槍垂雙拂爲號以報范
喜謂葵曰此賊勇而輕若果出必成擒矣乃悉精銳數
千而西取官軍素爲賊所易者張其旗幟誘之范麾軍
竝進葵親搏戰諸軍爭奮賊始疑非前日軍欲走入十

城李虎軍已塞其甕門全窘從數十騎北走葵率諸將以制勇寧淮軍蹙之賊趨新塘新塘自決水後淖深數尺會久晴浮戰塵如躁壤全騎陷淖不能拔制勇軍奮長槍三十餘亂刺之全曰無殺我我乃頭目先是令獲頭目無得爭以爲獻故羣卒碎其尸而分其鞍馬器甲并殺三十餘人類非卒伍俱不暇問三日間追賊黨連破之俘斬及奪回糧畜敵野葵使人瘞新塘骸骨得左掌無一指蓋全支解也揚州平善湘以露布上帝驚喜太后舉手加額國明輩懼禍及已云全未死至資遣士助愾之及泰州凱奏繼上浮言始定三月庚寅禡祭有

梟鳴于牙占之吉別遣全子才率王旻等將萬五千人與子玠倚角取鹽城四月壬戌范葵遣諸軍薄淮安城下賊大敗死者萬餘五月丙戌朔官兵攻城自丑至未五城俱破斬首數千級生擒數百人燒砦柵萬餘家夷五城餘址賊始懼巳亥子才率趙必勝王旻軍移砦西門道遇賊大戰又敗之楊氏諭衍德等曰二十年梨花槍天下無敵手今事勢已去撐拄不行我欲歸老漣水汝等請降可乎翌日楊氏絕淮而去賊黨遣使款軍門范等密聞于朝不可范乃陽許以誤之衍德等自知降亦不免始送款于金六月巳未大戰于河西三砦賊大

敗楊氏歸漣水甲子復大戰淮安遂平議乘勝復淮陰
兵未行淮陰降金繼得探報云宋師遲一宿攻城淮安
亦爲金有矣於是全所據州悉平全之寇泰州官屬十
有九人皆迎降獨教授高夢月不汙又有海陵簿吳嘉
罵賊而死各褒贈錄嘉一子楊氏竄歸山東數年而後
斃全子松壽又名壇仕元爲江淮大都督亦嘗窺海道
犯淮安景定三年以漣海三城來歸獻山東郡縣請贖
父過詔授壇保信寧武軍節度使封齊郡王復全官爵
明年元兵圍濟南壇兵敗死焉

劉整鄧州人自金避亂入宋得隸荆湖制置使孟珙麾

下珙攻金信陽整爲前鋒夜縱十二勇士渡塹登城襲擒其守還報珙大驚擬之唐李存孝十八騎拔洛陽也乃書其旗曰賽存孝黑遷知瀘州兼潼川安撫副使元兵以內難解鄂州圍督帥賈似道用整計殺殿兵以肅清間整與南方諸將多不相能制置使呂文德俞興尤忌之會似道託會計邊費以陷諸閩整遂爲興所按整懼乃籍州之十五郡戶二十萬降于元景定二年七月也元主忽必烈授整夔府行省兼安撫使給以金符數年爲鎮國上將軍都元帥總漢軍方整之叛也興率兵討整屢爲所敗安撫高遠兵亦屢敗四川都統張桂及

統制金文德曹顥俱戰死顥闔門死整每爲元主言宋
可圖宜益屯兵廣儲積又曰臣願效犬馬勞先攻襄陽
撤其捍蔽元之群臣沮之整又曰自古帝王非四海一
家不爲正統今何置一隅不問自棄正統耶於是元主
意決遣整同阿木督兵圍襄陽城鹿門堡及白河口爲
攻取計旣而築實心臺於漢水中流多置戰具又築外
圍以斷援兵造戰艦習水軍以奪中國長技皆整謀也
咸淳八年五月荆湖制置使李庭芝遣都統張順張貴
援襄陽整邀擊順死之惟貴得入城數月貴率兵出求
援整謀知迎戰于龍尾洲殺貴殲其衆庭芝以金印示

符授整漢軍都元帥盧龍軍節度使封燕郡王爲書使
求寧僧持送整所以間整事覺整對元主曰宋設此以
殺臣臣實不知元主命整復書謂受元主命不敢負也
時襄陽拒守已五年整計襄樊唇齒宜先攻樊城九年
樊守將范天順牛富俱戰死整屠其城遣所擒宋將唐
末堅諭襄帥呂文煥文煥遂降元主賜整田宅金幣良
馬整謂元主曰襄陽破則臨安搖矣若將所練水軍乘
勝長驅長江必皆非宋有元主改整行淮西樞密院事
陞驃騎上將軍行中書左丞尋詔整別將兵出淮南整
銳欲渡江首將止之不果行及聞伯顏入鄂捷憤惋而

卒整乘蒙古方張之勢而效其知能以圖富貴宋之亡
皆整爲之忍矣哉

呂文煥安豐人文德之弟也文德有材勇淮帥趙葵招
致麾下累功擢夔路策應使景德二年授太尉京湖安
撫制置使兼知鄂州劉整叛俞興罷文德兼四川宣撫
使復瀘州遂授開府儀同三司四年浚築鄂常澧城池
迄事加寧武保康軍節度使度宗屢賜褒詔授少傅時
劉整獻計元主謂南人所恃惟文德然可以利誘乃遣
文德王帶求置榷場於襄陽城外仍築土墻以護居積
文德爲請於朝外通互市內固堡壘時出兵哨掠

德

始悟爲所賣後聞元人益兵圍襄樊爲必取之計文德
嘆曰誤國家者我也疽發背乞致仕授少師衛國公尋
卒贈太傅諡武忠德祐元年追封和義郡王呂文信者
亦文德弟也歷官武功大夫沿江制司諮議官德祐初
與元兵戰于南康死之贈定遠軍承宣使文煥度宗時
自帶行御器械改知襄陽兼京西安撫副使元阿朮同
劉整攻襄陽文煥拒守凡五年頗有勞咸淳九年樊城
陷文煥遂納筦籥與其子俱降元且爲畫攻鄂策請身
爲先鋒元主卽以文煥爲襄陽大都督恭帝卽位文煥
引元兵攻破沙洋城執守將王大用總管王虎臣翌日

連破新城殺都統邊居誼語在居誼傳未幾文煥帥兵
犯鄂州都統程鵬飛及權守張晏然以城降太皇太后
謝氏詔文煥息兵脩好不省及獨松關陷遣兵部侍郎
呂師孟等使元軍師孟文德子也因詔文煥贊和議亦
不省德祐二年伯顏兵至臯亭山太皇太后遣使奉璽
迎降伯顏令文煥慰諭太皇太后文煥因入內上表謝
而出有曰茲銜北命來抗南師視以大馬報以仇讎非
曰子弟攻其父母不得已也尚何言哉伯顏拘文天祥
於軍中祈請使吳堅賈餘慶等繼往伯顏引天祥與同
坐天祥面斥餘慶賣國且讓伯顏失信文煥從旁諭解

天祥并斥文煥及師孟謂父子兄弟受國厚恩不能以死報國乃合族爲逆文煥大慙恚師孟語在天祥傳中呂文福者文煥從弟也歷典方州擢知閣門事又擢常德辰沅澧靖五郡鎮撫使知沅州恭帝立元兵日逼文福以所部淮兵入衛降詔褒獎尋加福州觀察使又加保康軍承宣使遣使趣之文福至饒州殺使者入江州降元於是常德鼎澧皆降矣呂師夔者亦文德子也歷官提舉江州興國宮請募兵禦元師許之德祐元年陳奕旣降元以元兵攻蘄州師夔適擢權刑部尚書都督府參贊公事不受命乃與知江州錢直孫遣人如蘄州

請降伯顏入江州師夔設宴庾公樓飾宗室二女以進
伯顏却之師夔與知信州謝枋得雅友善至是師夔以
元兵取江西攻信州枋得敗走饒榜捕之執妻子下獄
妻李死焉端宗之趨廣也師夔同元酋阿里海牙及塔
出等率兵攻襲廣州諸郡故帝日航海無寧居云陳奕
者初諂事賈似道之玉工以求進自小官躡貴顯爲制
置使知黃州程鵬飛旣降元以元兵攻黃州奕遣人請
降于壽昌軍且求名伯顏曰汝率衆來歸何慮名爵許
以沿江大都督奕大喜遂以城降奕子巖知安東州奕
以書諭之巖亦出降元主擢文煥諸人至中書左右丞

或參知政事皆治行省事云

夏貴溧陽人理宗時爲諸將累立戰功擢至保康軍承宣使左金吾上將軍知淮安兼淮東安撫副使京東招撫使賜金帶前後賜溧陽田六十頃旣而知廬州兼淮西安撫副使改四川安撫制置使兼知重慶府度宗又賜金帶爲沿江制置副使兼知黃州累加檢校少保兼侍衛馬軍都指揮使又爲淮西安撫制置使兼知廬州賜錢百萬激犒咸淳十年元兵連攻陽邏堡夏貴兵俱敗貴沿江縱兵大掠歸廬州德祐元年元兵與孫虎臣戰于丁家洲虎臣兵敗奔魯港貴不戰而去故諸軍盡

潰元兵日逼加貴開府詔以所部兵入衛時貴已蓄異志縱北軍岳全還致款附意明年正月元兵犯臨安貴遂以淮西降元貴遣從子招知鎮巢軍洪福福斬之旣而福被執貴莅殺其二子并殺福福數貴不忠大詬之當姜才之被執臨刑也貴在傍亦爲才所切齒語在才傳元主擢貴至江淮行省左丞致仕仍官其子孫

范文虎乃天順之從父呂文德之壻也景定中以戰功遷至左領衛大將軍主管侍衛步軍司兼馬軍司尋以白鹿磯功賞七官咸淳中遷殿前副都指揮使元兵犯襄樊命文虎總統殿司兩淮諸軍援之賜錢百五十萬

犒師文虎陰蓄異志貽書丞相賈似道請從中制勿聽
命閫帥李庭芝於是文虎日恣淫樂久不進兵比戰又
不力兵屢敗統制朱勝總管朱日新鄭臯先後被獲所
喪舟楫甚衆及樊城陷襄陽降給事中陳宜中請誅文
虎似道庇之仍知安慶府事詳庭芝傳德祐元年正月
元兵犯江州文虎遣人以酒饌迎犒及犯安慶文虎遽
以城降伯顏授文虎兩浙大都督文虎持元主詔往諭
安豐壽州諸鎮復同失里伯史樞率兵招安豐軍呂文
煥陳奕先已降元用事太皇太后謝氏詔論文虎三人
使通和議息兵文虎等方且爲元將兵日攻陷州郡乃

籍三人家二年正月元兵逼臨安恭帝降元駟馬都尉
楊鎮等奉二王渡浙江入閩伯顏諭文虎率勁兵五千
追之至婺州不及而還伯顏以臨安府爲兩浙大都督
府命文虎同忙古帶入城視事宋宗室孟衆謀起兵事
泄文虎執而斬之元主擢文虎參知政事至平章政事
皆治行省事云時諸城守將降元者甚衆若池州都統
張林京湖宣撫朱禩孫湖北制置副使知江陵府高達
成都安撫使胥萬壽知太平州孟之縉知平江府潛說
友嘉興安撫劉漢傑建康都統徐旺榮鎮江統制石祖
忠此其大者餘見本紀中元主嘗召詰其降之易對曰

宋有強臣賈似道擅國柄每輕武臣故心離而體解元主曰此惟似道一人之過耳汝主何負焉然則似道之輕汝也固宜

留夢炎衢州人淳祐五年登進士第一咸淳元年自權禮部尚書遷端明殿學士簽書樞密院事未幾進樞密使四年以觀文殿學士知潭州兼湖南安撫使德祐元年六月入朝拜右丞相兼樞密使都督諸路兵馬臺臣劾賈似道誤國請竄嶺表籍其家夢炎庇似道欲輕其罰簽樞高斯得力辨之斯得與平章事王爚御史俞浙相繼罷去皆夢炎爲之十月進左丞相時元兵日迫中

外文武諸臣率避禍逃竄大皇太后榜朝堂甲以國法弗能止乃十一月夢炎遁太皇太后兩遣使召之不至以爲江東西湖南北宣撫大使二年元將唆都陷衢州夢炎遂降宋亡丞相文天祥被執元主忽必烈欲官天祥不爲屈曰倘得黃冠歸故鄉他日以方外備顧問可也王績翁同夢炎降者謀之夢炎欲合宋臣十人請於元主釋天祥爲道士夢炎曰使天祥復號召江南置吾輩何地天祥竟被誅元授夢炎禮部尚書至翰林學士承旨元主嘗以夢炎葉李優劣問趙孟頫對曰夢炎臣之父執重厚有大臣器葉李所讀書臣皆讀之所知所

能臣皆知而能之元主曰汝以夢炎優於李耶夢炎是
宋狀元至宰相當賈似道誤國依阿取容李以布衣乃
伏闕上書是賢於夢炎也夢炎仕元凡二十年告老卒

宋史新編卷一百八十九

宋史新編卷一百九十

列傳一百三十二

世家上

明南京戶部主事莆田柯維祺著

夫百川朝宗于海其勢順也燭火不能與太陽爭明其
分定也是故有王者作則萬姓戴羣雄歸苟負固相抗
衡不可以言智矣自五季之亂豪傑蠭起各建號據土
傳其子孫迄宋興凡五國三鎮江南則李煜西蜀則孟
昶吳越則錢俶廣南則劉鋹太原則劉繼元湖南則周
保權荆南則高繼冲漳泉則留從效陳洪進太祖平江
湖蜀廣復得荆南太宗平太原復得漳泉吳越六十年

分裂之天下至是始合于一蓋天方贊宋誠難與爭知
幾者無咎用壯者有悔厥效可覩已史列諸國於世家
蓋本歐陽脩五代史今因之若脩已述者不復及云

南唐李氏

西蜀孟氏

吳越錢氏

南唐李景徐州人父昇吳楊行密將徐溫養子冒姓徐
名知誥受吳禪國號齊改元昇元僭號居金陵復姓李
改名昇自云唐宗室後改國號唐封景吳王改封齊王
立七年卒景襲位改元保大周顯德中屢破景軍旣連
克楊州將議濟江景大懼請盡割江北地畫江爲界稱
臣歲貢數十萬許之於是稟正朔表稱唐國主世宗答

書用唐報回鶻可汗之制云皇帝恭問江南國主建隆
元年太祖受命景屢遣使入貢太祖亦厚賜之初景襲
位也屬中原多故跨據江淮三十餘州擅魚鹽之利卽
山鑄錢物力富盛嘗試貢士高祖入關詩頗有窺覷中
上之意自世宗平淮甸寢以衰弱及太祖平揚州日習
馬舫戰艦於京城之南池景懼甚其小臣杜著僞作商
人由建安渡來歸又彭澤令薛良坐事責授池州文學
亦挺身來奔獻平南策景聞之益懼太祖命斬著於下
蜀市良配隸廬州衙校景乃安終以國境蹙弱不遑寧
居遂遷於豫章俄而景卒太祖廢朝五日遣使弔祭贈

賻子煜請追尊帝號許之煜乃謚景爲明道崇德文孝
皇帝廟號元宗

煜字重光景第六子也本名從嘉善屬文工書畫知音
律累封吳王建隆二年景立爲太子監國未幾襲位居
建康改名煜遣使來貢且奉表陳紹襲之意太祖詔答
焉自景畫江內附周世宗貽書於景至是因煜之立始
下詔而不名煜每聞朝廷出師克捷及嘉慶之事必遣
使犒師修貢吉凶大禮皆別修貢助煜有母妻之喪亦
遣使往弔開寶四年遣弟從謙來貢其數皆倍於前是
冬以將郊祀又遣弟從善來貢會嶺南平煜懼上表遂

改唐國主爲江南國主唐國印爲江南國主印又表請
所賜詔呼名許之煜又貶損制度官號多所改易五年
太祖以從善爲泰寧軍節度賜第留京師煜雖外示畏
服內實爲戰備太祖慮其難制令從善諭旨使來朝七
年秋詔煜赴闕煜稱疾不奉詔冬乃命曹彬潘美率兵
討之煜聞大兵將舉甚惶懼遣其弟從鎰及潘慎脩來
貢及至遂留於別館王師克池州大破其衆於采石磯
擒其將初朝廷將有事江表江南進士樊若水詣闕獻
策請造浮梁以濟師議者以爲古未有作浮梁渡大江
者恐不能就乃先試於石埭口移置采石三日而成渡

江若履平地八年春王師薄城下煜召宋令贇於上江
令連巨筏載甲士數萬人順流而下將斷浮梁未至爲
劉遇所破又募勇士五千餘人謀襲官軍皆素不習戰
宋師縱其至擊之殲焉又獲其將煜危迫甚遣其臣徐
鉉周惟簡奉方物來貢屢哀懇求罷兵太祖不許是年
冬城陷曹彬等駐兵于宮門煜率其近臣迎拜於門彬
等上露布以煜并其宰相湯悅等四十五人上獻太祖
御明德樓以煜嘗奉正朔詔有司勿宣露布止令煜等
白衣紗帽至樓下待罪詔誼釋之賜資有差詔曰江南
僞主李煜聚兵峻壘包蓄日新勞銳旅以徂征傳孤城

而問罪洎聞危迫累示招攜何迷復之不振果覆亡之
自撥昔者唐堯光宅非無丹浦之師夏禹泣辜不赦防
風之罪朕以道存包荒恩推惡殺式優待遇盡捨尤違
可光祿大夫檢校太傅右千牛衛上將軍仍封違命侯
以其子仲富爲左千牛衛大將軍弟從鎰等姪仲遠等
俱進秩有差太宗卽位始去違命侯加特進封隴西郡
公卒年四十二贈太師追封吳王先是江南民間有服
玩侈靡之謠及煜時宮衣有天水碧之號皆歸宋之徵
也語在五行志其國事詳見五代史

從善字子師僞封鄭王累遷太尉中書令後降封南楚

國公開寶四年春奉方物來貢授泰寧軍節度充海沂等州觀察等使留京師已復授節制仍賜甲第一區二南平改右神武大將軍雍熙初再遷右千牛衛上將軍出爲通許監軍卒

從誦本名從謙僞封吉王後降封諤國公歸朝歷右龍武大將軍知隋復成三州淳化五年上言貧不能自給求外任許之子忤偃大中祥符八年進士

季操昇從父弟歸朝累遷左衛大將軍領康州刺史歷知淮陽漣水二軍蔡舒二州卒

仲寓字叔章有文藝僞封清源郡公歸朝爲千牛衛大

將軍煜卒宗族百餘口貧不能給上書自陳太宗授鄆州刺史爲政寬簡部內甚治未幾卒

舒元頴州人少倜儻好學與道士楊訥講習於嵩陽通左氏及公穀二傳與訥同詣李守貞館於門下守貞敗元易姓朱楊訥更姓名爲李平元事李景至淮南北面招討使遭譖被代元憤怒自以戰功高又不忍負景欲自殺門下客宋洎諫曰大丈夫何往不取富貴豈必爲妻子死哉元聽之將其衆歸世宗景盡誅其妻子世宗素知元驍果得之甚喜以爲檢校太保歷濠州防禦使宋初從平李重進改沂州防禦使爲滑州巡檢使詔元

復姓舒氏後爲白皮兵馬都監卒特贈武泰軍節度次
子知雄歷鄜延路駐泊都監後辭疾居嵩山太宗召授
西京作坊副使泉福都巡檢使真宗初懇請入道歸嵩
陽舊隱復以薦授供備庫使歷知處州復求入道而賜
紫冠服號崇玄太師嘗獻字母圖有詔褒獎卒年八十
一

韓熙載字叔言濰州北海人後唐同光中第進士名聞
京洛父光嗣爲平盧軍節度副使被誅熙載奔江南歷
仕李昇及子景擢至知制誥兵部尚書熙載善爲文江
東士人道釋載金帛以求銘誌碑記者不絕又累獲賞

賜由是畜妓妾四十餘人多善音樂不加防閑恣其出入外齋以帷薄不脩責授右庶子分司洪州熙載盡斥諸妓單車卽路煜留之俄而復位諸妓復集如故煜歎曰吾亦無如之何遷中書侍郎光政殿學士承旨開寶中卒贈左僕射平章事謚文靖熙載才氣俊逸機用周敏性高簡無所卑屈江左號爲韓夫子云

馮說本名延魯字叔文其先彭城人唐末南渡家于新安與兄延巳俱以文學得幸李景歷工部侍郎東都副留守同世宗下楊州謚髡髮爲僧爲所獲釋之數年拜刑部侍郎放還爲戶部尚書建隆三年煜遣來貢因表

求舒州田宅詔賜之後改常州觀察使卒子伉歸中朝
與兄儀价竝登進士第伉文辭清麗嘗著率普頌時人
稱之累遷殿中侍御史歷典藩郡皆有治跡咸平中知
福州卒

潘佑南唐散騎常侍處常之子少介僻杜門讀書不交
人事及長善屬文尤長於論議仕李景及子煜至知制
誥內史舍人有李平者本楊訥易姓名者也歷戶部侍
郎佑與平俱好神仙遂相善佑嘗建議復井田及依周
禮置牛籍薦平判司農寺以督之事行百姓大撓未幾
而罷佑自以爲衆所排因憤怒歷詆大臣朋比謀叛

薦平知省事又薦星官楊熙澄爲樞密使小校侯英興
禁兵煜不納佑益忿抗疏請誅宰相湯悅等數十人煜
手書教戒之佑不復朝謁乃於家上書曰臣聞三軍可
奪帥也匹夫不可奪志也近者連上表章指陳姦惡何
面目以見士人乎遂自縊死

皇甫繼勳江州節度使暉之子幼以陰爲軍校父死難
於滁州累遷神衛統軍都指揮使貲產優贍營第舍畜
妓樂極遊宴之好及宋師至諸軍多敗勳欲煜之
速降每衆中流言頗道國中蹙弱姪紹傑亦以繼勳故
爲巡檢常令紹傑入見煜陳歸命之計會有風電繼勳

又密陳滅亡之兆煜併紹傑誅之

周惟簡鄱陽人隱居好學問明易義李煜召爲國子博士集賢侍講頃之以虞部郎中致仕宋師圍金陵張洎薦惟簡有遠略可以談笑和解之召爲給事中與徐鉉奉使至京師太祖召見詰責惟簡惶恐反言曰臣本居山野無仕進意李煜強遣來耳臣聞終南多靈藥事寧後願得棲隱太祖許之江南平命爲國子周易博士判監事開寶九年上書述前志求解官非其心也改虞部郎中致仕太宗立自終南詣闕求入見有司以非詔旨却之歲餘復上表自求用遷水部員外郎卒子繕舉進

士至都官員外郎

西蜀孟昶初名仁贊其先邢州人父知祥事後唐武皇
武皇以弟之子妻之歷劔南西川節度副大使知節度
事明宗卽位命知祥討平東川知祥自領兩川節度明
宗卽以授之長興四年封蜀王許行墨制五年閔帝立
乃稱帝於蜀改元明德時清泰元年也事具五代史昶
母李氏本莊宗嬪御以賜知祥知祥僭號以昶爲檢校
太保同平章事崇聖宮使東川節度知祥疾立爲皇太
子權監軍國明德元年七月知祥卒昶襲位年始十六
止稱明德年號委政於趙季良張知業李仁罕等二年

尊其母李氏爲皇太后四年改元廣政後以事誅仁罕
知業乃親政事周世宗時致書稱大蜀皇帝世宗怒其
無禮不答昶不自安乃於劒門夔峽多積芻粟增置師
旅用度不足遂鑄鐵錢禁境內鐵置場鬻之以專其利
立其子玄喆爲太子用王昭遠伊審徵韓保正趙崇韜
等掌機要總內外兵柄母李氏謂昶曰吾嘗見莊宗跨
河與梁軍戰又見爾父在并州捍契丹定兩川當時主
兵者非有功不授故士卒畏服此輩素不知兵一旦邊
疆警急何以禦敵太祖下荆楚昶欲遣使朝貢昭遠等
固止之乾德二年昶遣孫遇楊鐸趙彥韜爲謀至京師

彥韜潛取昶與并州劉鈞蠟九帛書以告其書云傳弔
伐之嘉音動輔車之喜色太祖曰吾用師有名矣卽命
王全斌等分路討之詔孫遇等指畫江山曲折之狀及
兵砦戍守之處道里遠近俾畫工圖之以授全斌全斌
等兵至昶遣王昭遠趙崇韜等來拒戰相繼就擒昶大
懼出金帛募兵令其子玄喆統之以守劔門玄喆離成
都但攜姬妾樂器及伶人數十輩晨夜嬉戲不恤軍政
至絲州聞宋師已破劔門遂遯歸昶益惶駭三年正月
昶遣其通奏伊審徵齎表詣全斌請降且言中外骨肉
二百餘人有親年幾七十願終甘旨之養免賜睽離之

責全斌等旣受其降遣康延澤入城見昶諭以恩信留三日盡封府庫而還昶又遣其弟仁贇詣闕上表待罪太祖詔赦之昶乃舉族與官屬由峽江而下上迭遣使迎勞之昶至率子弟素服待罪闕下太祖御崇元殿備禮見之昶及母以下賜賚有差卽日宴於大明殿先是詔有司起大第五百間以待昶供帳悉備至是賜之又爲其官屬各營居第翌日詔拜昶開府儀同三司檢校太師兼中書令秦國公昶子玄喆弟仁贇等及官屬除拜有差昶數日卒年四十七太祖廢朝五日素服發哀追封楚王諡恭孝昶之卒也其母李氏不哭以酒酹地

曰汝不能死社稷貪生以至今日吾所以忍死者以汝在爾今汝旣死吾何生爲因不食數日卒太祖聞而傷之賻贈加等贈剌墳莊一區初昶在蜀專務奢靡爲七寶溺器他物稱是周世宗欲討之而未果至太祖乃平之其所題桃符乃降宋之兆也語在五行志

玄喆字遵聖幼聰悟善隸書僭封秦王檢校太尉同平章事判六軍諸衛事旣而領武德軍節度又加兼侍中未幾立爲皇太子入朝與昶同日宣制檢校太尉泰寧軍節度移鎮貝州十餘年亦有治迹太平興國初移鎮定州三年加開府儀同三司四年從平太原就命爲鎮

州駐泊兵馬鈴轄又從征幽州率所部攻城之西面會
班師命帥兵歸屯定州俄與諸將校破契丹於徐河以
功封滕國公入爲左龍武軍統軍判右金吾衛仗未幾
知滑州淳化初以病求小郡養疾移知滁州卒年五十
五贈侍中有子十五人隆記隆詒隆詮並進士及
第玄喆弟玄珏歷右神武統軍出知滑州卒

仁贇字忠美僭封雅王檢校太傅旣而領閬州保寧軍
節度加大尉歸朝授右神武統軍丁母憂起復領大同
軍節度西京都巡檢使卒贈太子太師

仁裕字鳴謙與仁贇同日封彭王後亦領節鎮加檢校

太尉歸朝授檢校太傅右監門衛上將軍遷右羽林軍卒贈太子太傅

仁操亦與仁贇同日封嘉王後亦領節鎮加檢校太尉歸朝授右監門衛上將軍累遷右龍武統軍卒

伊審徵字申圖并州人父延瓌隨知祥入蜀知祥僭位以女妻之歷陵嘉眉三州刺史審徵幼以孝聞母病割股肉啖之以父任歷武泰軍節度使選其子崇度尚公主又改寧江軍節度同平章事與王昭遠俱掌機務常自以康濟經略爲已任屬宋師入境審徵首奉降表詣軍前昭遠時統軍敗走時人笑之審徵歸朝授靜難軍

節度太宗以判右金吾衛仗卒

韓保正字永吉潞州人父昭運從知祥入蜀及知祥僭號署珍州刺史保正事知祥及昶累遷奉鸞肅衛馬步軍都指揮使選其子崇遂尚主宋初荆南高繼沖納土昶聞之以保正爲峽路都指揮制置使屯夔州以經畫邊事遷檢校太尉兼侍中聞太祖將加兵以保正爲山南節度興元武定緣邊諸砦屯駐都指揮使及王全斌至保正棄興元保西縣爲史延德所破擒送全斌驛置關下未及命官卒贈右千牛衛上將軍

王昭遠成都人幼孤貧依東郭僧爲童子知祥飯僧府

署見昭遠聰慧留給事昝左右副位累遷知樞密院事
歷夔州寧江軍節度未幾兼領山南西道節度同平章
事及入謝求解樞密許之昭遠好讀兵書頗以方略自
許宋師入境昝遣昭遠與趙崇韜率兵拒戰將至漢源
聞劔門已破昭遠股慄發言失次崇韜布陣將戰昭遠
據胡床皇恐不能起俄崇韜敗乃免冒走匿誦羅隱詩
云運去英雄不自由俄爲追騎所執送闕下太祖釋之
授左領軍衛大將軍

趙崇韜太原人父廷隱事知祥累功遷至太師中書令
宋王卒謚忠武崇韜驍果有父風昝累遷至左右衛聖

步軍都指揮使選其子文亮尚主加領洋州武定軍節度山南武定緣邊諸砦都指揮副使漢源之戰獨策馬先登及蜀軍敗猶手擊殺十數人爲宋師所擒

高彥儔太原人父暉宣威軍使彥儔仕知祥及昶累遷夔州寧江軍都巡檢制置招討使加宣徽北院事利州昭武軍節度及宋師至師敗城陷判官羅濟勸令單騎歸成都彥儔曰我昔已失天水今復不能守夔州縱不忍殺我亦何面目見蜀人哉濟又勸其降彥儔曰老幼百口在成都若一身偷生舉族何負吾今日止有死耳卽解符印授濟具衣冠望西北再拜登樓縱火自焚初

昶母語昶惟彥儔可任及是果能死難

趙彥韜興州人爲本州義軍裨校昶遣與孫遇楊燭爲謀至都下因泄其事太祖并赦遇燭伐蜀以爲鄉導彥韜歷遷澧州刺史卒

龍景昭夔州人事蜀權至施州刺史乾德中諸將伐蜀兵將壓境景昭率官吏犒師迎入城蜀平卽授永州刺史秩滿改右千牛衛將軍卒

幸寅遜蜀人仕昶歷翰林學士加工部侍郎領簡州刺史歸朝授右庶子嘗上疏諫獵太祖嘉之召見賜帛開寶五年爲鎮國軍行軍司馬罷職年九十餘尚有仕進

意沿裝赴闕未登路卒

李廷珪太原人仕至遂州武信軍節度領本鎮及保寧軍都巡檢使其與玄詰拒宋師也狼狽而還所經州縣盡焚儲蓄及全斌等入成都王仁贍案籍詰軍須康延澤謂廷珪曰王公志在聲色苟得所欲則置不問矣廷珪求女妓四人貸金帛數百萬遺之繇是獲免歸闕爲右千牛衛上將軍卒廷珪諸人川中各有田宅昶降獻於朝詔賜錢償焉

李昊字穹佐自言唐相紳之後嘗仕蜀王衍至中書舍人翰林學士歷事知祥及昶累官門下侍郎兼戶部尚

書同平章事監修國史俄加左僕射自知祥領蜀凡章
奏書檄皆出吳手至是集爲百卷曰經緯略以獻俄命
判度支戶部廣政十四年脩成昶實錄四十卷昶欲取
觀吳曰帝王不閱史不敢奉詔以判使辦集封趙國公
俄加司空領遂州武信軍節度出判鹽鐵加弘文館大
學士修奉太廟禮儀使又改判度支使其子孝連尚昶
女蜀平隨昶入朝太祖優待之拜吳工部尚書賜第二
子皆進秩卒吳前後仕蜀五十年昶之世吳位兼將相
秉利權資貨歲入鉅萬奢侈尤甚後堂妓妾曳羅綺數
百人昶與江南李景通好遣其臣趙季札至江南購得

唐李紳武宗朝拜相制書還以遺吳吳喜甚大會賓客宴飲所費無算以帛二千匹謝李札初王衍降莊宗吳草其表昶之降也其表亦吳所爲蜀人潛署其門曰世修降表李家有集二十卷目爲樞機應用集孫德諱進士及第

母守素字表淳河中人父昭裔仕蜀至宰相太子太師致仕守素弱冠起家累遷工部尚書守素奉親頗勤至雖隆暑暮歸必朝服執簡以申昏定之禮入朝授工部侍郎坐居父喪娶妾免開寶初起爲國子祭酒歷知州兼本管諸州水陸轉運使卒次子克恭尚書

至左監門衛將軍

歐陽迴益州人掌事蜀王衍及知祥父子累官門下侍郎兼戶部尚書平章事歸朝歷左散騎常侍充翰林學士嶺南平議遣迴祭南海迴聞之稱病不出太祖怒罷其職分司西京卒贈工部尚書迴性坦率無檢操雅善長笛太祖召偏殿令奏數曲御史中丞劉溫叟聞之叩殿門求見諫曰禁署之職典司誥命不可作伶人之事上曰朕嘗聞孟昶君臣溺於聲樂迴至宰司尚習此技故爲我擒所以召迴欲驗言者之不誣也溫叟謝曰臣愚不識陛下鑒戒微旨自是不復召迴好爲歌詩甚富

掌誥命非所長但蜀之卿相奢靡相尚迴能守儉素此其可稱也

吳越錢俶字文德臨安人本名弘俶以犯宣祖偏諱去之祖鏐因譴策之亂據有吳越昭宗授以杭越兩藩節制封彭城郡王歷梁後唐加吳越國王卒子元瓘嗣元瓘卒子佐嗣佐卒弟侔嗣爲其大將胡進思所廢遂迎立俶事具五代史俶卽元瓘之第九子也晉開運中爲台州刺史數月有僧德詔語俶曰此地非君爲治之所當速歸不然不利俶從其言卽求歸國未幾有進思之變漢乾祐初授杭越等州大都督吳越國王賜號朝正

廣運同德保定功臣賜以金印王冊歷事周恭帝加賜
崇仁昭德宣忠保慶扶天翊亮功臣建隆初授天下兵
馬大元帥自太祖受命倣貢奉有加常數帝亦厚賚之
乾德初改賜功臣號開寶五年又改賜開吳鎮越崇文
耀武宣德守道功臣封其妻孫氏爲賢德順穆夫人特
命有司造大第於薰風門外連亘數坊儲侍什物無不
悉具賜名禮賢宅以待來朝賜之詔諭旨於倣七年冬
討江南詔以倣爲昇州東面招撫制置使賜戰馬旌旗
劔甲令丁德裕以禁兵步騎千人爲倣前鋒盡護其軍
李煜貽書於倣其略曰今日無我明日豈有君一旦明

天子易地酬勲王亦大梁一布衣耳倣不答以書來上
八年倣率兵拔常州加守太師詔倣歸國倣遣大將沈
承禮等率兵水陸隨王師平潤州遂進討金陵江南平
論將校功悉優擢九年二月倣與其妻孫氏子惟濬節
度使孫承祐來朝上遣皇子德昭至睢陽迎勞居禮賢
宅對於崇德殿貢白金四萬兩絹五萬匹賜襲衣玉帶
金器千兩白金器三千兩羅綺三千段卽日宴長春殿
倣又賀平江左助郊祭皆有貢二月詔賜劔履上殿書
詔不名以孫氏爲吳越國王妃宰相以爲異姓無封妃
之典太祖曰行自我朝表異恩也倣獻白金六萬兩絹

六萬匹爲謝俶歸國太祖宴餞於講武殿俶涕泣言願
三歲一朝太祖曰川陸遠當俟詔旨卽來覲也自俶
之至逮於歸國太祖所賜不可勝計俶旣歸國嘗視事
功臣堂一日命坐于東偏謂左右曰西北者神京在焉
天威不遠顏咫尺敢寧居乎太宗卽位加食邑五千戶
俶貢品物鉅萬又請歲增常貢詔不許太平興國三年
三月來朝對於崇德殿賜俶及賓佐衣帶器幣有差卽
日宴俶長春殿令劉鋹李煜預坐俶以金幣珍寶土物
上獻四月會陳洪進納土俶上言曰臣伏有懇誠貯於
肺腑幸因入覲輒敢上聞蓋虞神道之害盈必蕪天慈

之從欲乞納軍士器甲仍罷吳越國王及天下兵馬大
元帥職名凡頒詔命願復名呼優詔不許五月乙酉倣
再上表云陛下嗣守丕基削平諸夏凡在率濱之內悉
歸輿地之圖獨臣一邦僻介江表職貢雖陳於外府版
籍未歸於有司尚令山越之民猶隔陶唐之化太陽爰
照不及蔀家春雷發聲元爲聾俗則臣實使之然也願
以所管十三州獻于闕下詔許之丁亥詔封倣爲淮海
國王仍改賜寧淮鎮海崇文耀武宣德守道功臣卽以
禮賢宅賜之其子弟將校並進秩體貌隆盛冠絕一時
是歲七月中元京城張燈令有司於倣宅前設燈山陳

聲樂以寵之八月令親屬及管內官吏悉歸朝四年四月從征太原會劉繼元降上御連城臺誅軍中先亡命太原者顧謂俶曰卿能保全一方以歸於我不致血刃深可嘉也俶頓首謝還京策勳加食邑二萬戶實封二千戶五年八月俶被病上臨問優賜之六年又被病賜告久之上遣中使賜俶文楸棋局水精棋子乃諭旨曰朕機務之餘頗曾留意以卿在假可用此遣日八年冬累表求罷職優詔褒之但罷兵馬大元帥餘如故雍熙元年改封漢南國王四年春出爲武勝軍節度改封南陽國王又改封許王端拱元年春徙封鄧王會朝廷遣

使賜生辰器幣與使者宴歆至暮有大流星墮正寢光
燭庭是夕暴卒年六十俶以天成四年八月二十四日
生至是八月二十四日卒復與父元瓘卒日同人皆異
之上爲廢朝七日追封秦國王謚忠懿仍正僭備禮發
冊有曰天道難諶梁木斯壞長沙旣往空存甲令之動
征虜云亡但見雲臺之像庸加典則以厚始終命中使
護其喪歸葬洛陽自謬至俶世有吳越之地僅百年管
內諸州皆子弟將校授任而後請於朝有至使相者俶
善始令終窮極富貴福履之盛近代無比頗知書雅好
吟詠有詩數百首曰正本集陶穀爲之序性謙和未嘗

忤物崇信釋氏前後造寺數百歸朝又以愛子爲僧善
草書上有玉硯象管蜀牋之賜初倣爲胡進思所立廢
其兄侬徙越州進思屢請除之恐爲後患倣泣曰若殺
吾兄吾終不忍汝欲行其志吾當退避賢路進思慙而
退倣慮進思害侬遣親將薛溫爲侬守衛戒之曰委汝
以保全廢王苟有非常汝當以死扞之溫至越旬餘有
二卒夜持刃踰垣入侬闔戶拒之呼聲達於外溫領徒
入斃二卒於庭乃進思所遣也後左右屢有以侬爲言
倣終拒之侬居越州二十餘年卒子惟濬惟治惟演惟
灝惟潛惟濟惟渲至韶州團練使惟灊賀州團練使惟

晉至左龍武將軍獎州刺史惟演惟濟皆童年召見慰勞並起家諸衛將軍惟演自有傳神宗時以知杭州趙抃言錢氏父祖妃夫人子孫墳廟在錢唐臨安者三十餘所立表忠觀以時修治理宗給田三百畝付觀旌功德焉

惟濬字禹川倣嫡子也裁數歲倣表授節度副使檢校太保宋初領建武軍節度加至太尉後授鎮東等軍節度浙江東西道觀察處置兩浙制置營田發運等使大兵征金陵惟濬從倣下毗陵以功加平章事太宗卽位加兼侍中倣獻地改封惟濬亦徙淮南節度以郊祀恩

加檢校太師從平太原征幽薊又從幸大名雍熙中歷
鎮安州端拱初封蕭國公俶卒起復加兼中書令淳化
初暴卒追封邠王諡安僖子守吉守讓守讓頗勤學爲
文章退居多閉閣讀書屢獻歌頌真宗優詔褒獎有集
二十卷子恕娶曹王元偁女

惟治字和世廢王侖之長子侖初遷於越而惟治生俶
愛之養爲己子累遷檢校太保台州團練使乾德中制
授寧遠軍節度檢校太傅仍兼衙職與惟清節旄同日
而至國人榮之王師討江南惟治從俶率兵下常州策
勳改奉國軍節度太宗嗣位進檢校太尉俶旣納土惟

治歸朝改領鎮國軍節度惟治善草隸尤好二王書嘗
曰心能御手手能御筆則法在其中矣家藏書帖圖書
甚衆太宗命翰林書學賀正顯詣其第徧取視之曰諸
錢皆效浙僧亞棲之迹故筆力軟弱獨惟治爲工耳惟
治嘗以鍾繇王羲之唐玄宗墨跡凡七軸爲獻優詔褒
答雍熙三年大出師征幽州命惟治知直定軍府兼兵
馬都部署至則訓兵享士頗勤政務初惟濬雖倣嫡嗣
然倣以其放蕩無檢故畧惟治洎入朝惟濬止奉朝請
而委惟治藩任焉倣卒起復檢校太師累上表請罷節
鎮優詔不許惟治旣病心恍惚家事不肅坐歿右監門

衛上將軍晚年頗貧賈景德中其弟惟演獻文上對宰相稱其王公之後能苦心翰墨令記其名因曰錢氏繼世忠順子孫可念惟治頗貧乏尤可軫惻特轉右武衛上將軍月給奉十萬累加左驍衛上將軍左神武統軍卒年六十六贈太師惟治好學聚圖書萬餘卷多異本慕皮陸爲詩有集十卷書迹多爲人藏祕子丕字簡之幼好學仕終光祿少卿

惟濟字巖夫生七歲俶卦漢南王奏補本府元從指揮便歷東染院使拜封州刺史其後請試郡真宗命知絳州民有條桑者盜奪桑不能得乃自創其臂誣桑主欲

殺人又繫不能辨惟濟取盜與之食視之盜以左手舉
七筋惟濟曰以右手創人者上重下輕今汝創特下重
正用左手傷右臂非爾自爲之邪辭遂服歷事仁宗累
遷至保靜軍節度觀察留後惟濟喜賓客豐宴犒家無
餘貲卒贈平江節度使謚宣惠有玉季集二十卷惟濟
有吏幹能戢下而性苛忍所至牽蔓滿獄重囚梟市或
斷手足探肝膽云

嚴字誠允倣異母弟也本名信淳化初改焉幼爲沙門
長謹慎好學倣襲國封命爲鎮東軍安撫副使周顯
德中奏署衢州刺史宋累遷隨州觀察使兄儀爲金

觀察使卒而儼代之出判和州在職十七年卒年六十
七贈昭化軍節度儼博涉經史少夢人遺以大硯自是
樂爲文辭頗敏速富贍當時國中詞翰多出其手歸京
師與文士遊歌詠不絕淳化初嘗獻皇猷錄咸平又獻
光聖錄所著有前後集吳越備史及備史遺事忠懿王
勲業志各若干卷又作貴溪叟自敘傳一卷善飲酒百
卮不醉居外郡嘗患無敵或言一軍校差可倫擬儼問
其狀曰飲益多手益恭儼曰此亦變常非善飲也
昱字就之佐之長子佐卒昱尚幼國人立宗遂以昱爲
咸寧大安二宮使歷台州刺史王師討江南爲東南水

陸行營應援使從倣入朝授白州刺史昱好學多聚書
喜吟詠多與中朝卿大夫唱酬嘗與沙門贊寧談竹事
迭錄所記昱得百餘條因集爲竹譜三卷歷官郢州團
練使卒昱善筆札工尺牘聰敏能覆棋工琴畫飲酒至
斗餘不亂善諧謔生平交舊終日談宴未曾犯家諱有
集二十卷然貪猥縱肆無名節可稱生子百數涉雍熙
中進士及第倣之群從又有昭序者字著明好學喜聚
書仕以勤幹聞至如京副使昭度字九齡至供奉官俊
敏工爲詩多齷齪有集十卷

孫承祐錢唐人倣納其姊爲妃因懼處要職至中吳軍

節度從倣克毗陵功居多詔改中吳軍爲平江軍真授
承祐節太平興國中倣來朝盡獻其地徙承祐泰寧軍
節度使歷知滑州卒贈太子太師承祐在浙日憑藉親
寵恣爲奢侈每一飲宴殺物命千數常膳亦數十品方
下筯從車駕北征以橐駝負大斛貯水養魚自隨至幽
州南村落間日已旰石守信諸人尚未朝今適遇承祐
卽延所止幕舍中膾魚具食窮極水陸人皆異之承祐
少時嘗夢人以著草一本增其一而授之旣寤以語所
親曰大衍之數五十其用四十有九今增其一我壽止
於此乎果五十而卒

沈承禮烏程人錢元瓘以女妻之歷事佐及倭累官威武軍節度事主師征江南錄功真授福州節制後倭獻地徙承禮鎮密州卒贈太子太師初秦王廷美之敗也有司按驗倭惟潛孫承祐及陳洪進皆實有贈遺獨承禮無焉

宋史新編卷一百九十